

2756. XIV, 1-3 — Carta de el-rei de Castela a D. João de Aboim, mordomo-mór de el-rei de Portugal, e para Pedro Anes, seu filho, na qual lhes ordenava entregassem a el-rei de Portugal os castelos das vilas de Tavira e de Loulé, de Faro, de Portimão, de Silves e de Aljezur e toda a terra do Algarve com suas pertenças e direitos. Badajós, 1267, Fevereiro, 16 — *Pergaminho. Bom estado. Selo pendente de chumbo.*

Dom Alfonso por la gracia de Dios rey de Castiella de Toledo de Leon de Gallizia de Sevilla de Cordova de Murcia y de Jahen. A vos Don Johan d'Avoyñ mayordomo del rey de Portugal y a vos Pedro Eanes fijo desse mesmo Don Johan d'Avoyñ salud e gracia. Mandamos a vos firmemiente y otorgamos que vista esta carta dedes y entreguedes al rey Don Alfonso de Portugal o a quien el mandar todos los castiellos del Algarve que son estos Tavyra y Leule y Sancta Maria de Faaron y Paterna y Silve y Aljazur con todas sus pertenencias e con todos sus derechos y con todas sus rendas y toda la tierra del Algarve con todo su señorío. Y si por aventura muriesse el rey Don Alfonso de Portugal ante que esta entrega fuesse fecha mandamos y otorgamos a vos amos y a cada uno de vos que dedes y entreguedes a Don Denis primero fijo y heredero desse Don Alfonso rey de Portugal o al otro su hermano o hermana si Don Denis muriesse ante que essa sobredicha entrega fuesse fecha todos los castiellos y toda la tierra del Algarve y todas las cosas sobredichas. E nos sobredicho rey Don Alfonso quitamos pora siempre a vos Don Johan d'Avoyñ y a vos Pedro Eanes fijo desse mesmo Don Johan d'Avoyñ a amos en uno y a cada uno por si el omenage que a nos

fiziestes amos y cada una de vos de todos los castiellos sobredichos del Algarve y de cada uno dellos y quitamos aun a vos pora siempre el omenage que a nos fiziestes sobre todos los pleytos y todas las posturas que fueron puestas y escriptas entre nos y Don Alfonso rey de Portugal y Don Denis y sus fijos y sus fijas desse rey de Portugal por qual razon vos teniedes los castiellos sobredichos del Algarve pora seer a nos complidos los pleytos y las posturas que fueron puestas y escriptas entre nos y el sobredicho rey Don Alfonso de Portugal y Don Denis su fijo y los otros sus fijos y sus fijas desse rey de Portugal por razon del Algarve.

E desd'aquí adelante damos a vos amos y a cada uno de vos por quitos pora siempre del omenage que a nos fiziestes de los castiellos sobredichos del Algarve y de todos los pleytos y de todas las posturas sobredichas que desd'aquí adelante nunca a nos ni a otro por nos seades tenudos de responder de todas estas cosas sobredichas nin de ninguna dellas. E dezimos y otorgamos y damos por derecho que vos amos y cada uno de vos dando y entregando los castiellos sobredichos del Algarve al sobredicho rey Don Alfonso de Portugal o a Don Denis o al otro su fijo o su fija desse rey de Portugal assi como sobredicho es que vos fazedes derecho en los dar y gelos entregar y esse rey de Portugal o su fijo o fija fazen derecho en los recibir assi como sobredicho es y vos y cada uno de vos fazedes todo vuestro derecho dessos castiellos y sodes quitos del omenage que a nos fiziestes dessos castiellos.

E si por aventura desd'aquí adelante alguna carta o cartas apareciesse o apareciesen sobr'estos castiellos sobredichos o sobre omenage que vos dellos fiziesseades o sobre pleytos o posturas que fuessen fechas a nos o puestas sobre fecho del Algarve non valan y sean cassadas y non ayan ninguna firmedumbre y esta carta sea firme y estable pora sienpre. E que todo esto sea firme y estable pora sienpre y nunca pueda venir en dubda.

Damos ende a vos esta nuestra carta abierta seellada de nuestro seello de plomo que tengades en testimonio.

Fecha la carta en Badaloz por nuestro mandado. Miercoles diez y sex dias andados del mes de Febrero en era de mill y trezientos y cinco annos.

Millan Perez la fizo escrevir.

(B. R.)